

# شنگر

## چھویں کی گوجری کتاب

6



دی جموں اینڈ کشمیر اسٹیٹ بورڈ آف سکول ایجوکیشن

First Edition : Jan. 2019  
PD. 0.5T

پہلا ایڈیشن:

★..... ناشر کی اذن لین کے بجن اس کتاب گا کسے وی حصہ ناں مڑ پیش کرن یا داشت کے نال اس ناں موڑ کے محفوظ کرن یا برقی، میکا نکی، فوٹو کاپی کرن، ریکارڈنگ کے ذریعے دو جاں تک پوہچا نوں منع ہے۔

★..... اس کتاب ناں اس شرط ورنچو جا رہیو ہے کہ اس ناں ناشر کا اذن کے بجن، اس شکل توں علاوہ جس ماں کہ یاہ چھاپے چاڑھی گئی ہے یعنی اس کی اجو کی کاٹھی بندی ہو رمنڈ لاصفحہ ماں بدلا کر کے اس ناں بچن واسطے نہ تے ادھار دتو جا سکے نہ ہی دوبارہ بیچی جا سکے نہ کرایہ ورن دتی جا سکے اور نہ ہی اس ناں تلف کیو جا سکے۔

★..... کتاب کا اس صفحہ ورن جہڑی قیمت درج ہے واہی اس کی اصل قیمت ہے، کوئی وی نظر ثانی شدہ قیمت واہ ربڑ کی مہر ناں یا چھپی لا کے یا کسے ہو ر ذریعہ توں ظاہر کی جائے واہ غلط وھے گی ہو رقابل قبول نہیں ہو سیں۔

فاروق احمد پیر (ڈائریکٹر اکیڈمک)

ڈاکٹر یاسر حمید سہرا وال (اسٹنٹ ڈائریکٹر)

ڈاکٹر انور ادھا شرمہ (کوآڈینیٹر)

نگران

## مؤلفین:

- ڈاکٹر جاوید راہتی کنوینئر (گوجری) چیف ایڈیٹر کلچرل اکادمی • جان محمد حکیم (ماسٹر)
- محمد امین انجم (ماسٹر) • چودھری عبدالحمید (ماسٹر) • چودھری محمد اسلم (ماسٹر محکمہ تعلیم)

اشاعتی صلاح کار: ریاض احمد ملک (سکرٹری جے اینڈ کے اسٹیٹ بورڈ آف اسکول ایجوکیشن)

کمپوزنگ: عبدالواحد منہاس #9622861597

Printed at Design : TAJ PRINTERS ®  
Najaf Garh Road, Industrial Area, Moti Nagar New Delhi-15  
Mob.: 8920106645 | 9818333008 | 9818933008

## فہرست

۵	پہلی گل	
۹	دُعا/حمد	۱
۱۲	مولانا مہر الدین قمر	۲
۱۸	گیت.....توی	۳
۲۲	پانی	۴
۲۵	میاں نظام الدین لاروی	۵
۲۹	بن (جنگل)	۶
۳۳	نظم (مزاحیہ) راجو کا ٹھہلا	۷
۳۶	چٹھی	۸
۴۰	انٹرنیٹ	۹
۴۳	مان سر	۱۰

۴۷	کاروبار	۱۱
۵۰	گجراں کو موسمی سفر	۱۲
۵۵	ماں کی دُعا	۱۳
۵۸	لوک بار: مریاں ڈھینڈی	۱۴
۶۴	گوجری ٹوپی	۱۵
۶۸	غزوہ بدر کو واقعہ	۱۶
۷۴	ڈاکٹر بی۔ آرا مبیڈ کر	۱۷



## پہلی گل

ریاستی سرکار نے گوجری زبان ناں ریاست کا سرکاری تے  
غیر سرکاری سکولاں ماں لاگو کرن کو جھڑو کم شروع کیو ہے اُسے ناں اگے  
بدھاتاں واں گوجری درسی کتاباں کی لڑی ماں ہم نے ایک ہو ر کتاب تھارا  
ہتھاں ماں دتی ہے۔ اس ماں گوجری زبان ناں ہی نہیں بلکن گوجر ثقافت  
ناں وی منظر عام ورا آن کی کوشش کی گئی ایں جھڑی کہ تھارے باندے ایں۔  
ریاست ماں گوجری، کشمیری تے ڈوگری تیں بعد تیجی بڑی  
زبان ہے تے اس کا بولن آلا نہ صرف جموں و کشمیر بلکن برصغیر ہندوپاک کا  
بکھ بکھ علاقاں ماں آباد ہیں۔ یاہ زبان کیوں جے ہندوستان کی قبائلی

زبانوں میں بھی شامل ہے اس گلوں اس کی درسی کتاب بنانوں ہوروی  
ضروری تھو جس ناں کہ سٹیٹ بورڈ آف سکول ایجوکیشن نے چنگا طریقہ نال  
نبھایو ہے۔

مہار اچھہ جس گھڑی سکول ماں پڑھتا ویں تاں اُن ناں ایک  
سو کھوتے سولوراہ دسنوتے اُن کی رہنمائی کرنو ضروری وھے۔ اس ناں درسی  
کتاباں کی مدد نال خاصا چنگا طریقہ نال نبھایو جاسکے۔ اُن ساری درسی  
کتاباں ماں جھڑی گوجری واسطے بنائی گئی ایں ہم نے اس گل ور خاص  
دھیان دتو ہے کہ ہم بچاں کی لوڑتی رہنمائی کرسکاں۔ ہم نے تاریخ،  
سماجیات، لوک وراثت، شاعری تے دو جامضامین توں فائدہ لے کے اس  
کتاب ناں ترتیب دوا یو ہے، جھڑی کہ بچاں واسطے خاص طور ورا ہم ہے۔  
جموں و کشمیر سٹیٹ بورڈ آف سکول ایجوکیشن کو کم درسی کتاب  
تیار کرنو ہی نہیں بلکن ان کتاباں ناں بچوں بچوں دوبارہ دیکھنوتے ٹھیک کرنو  
وی ہے۔ ہور ان زباناں ناں سکولاں ماں لاگو کرن واسطے اُستاداں واسطے  
ورکشاپ کرنو وی ہے، جھڑی کہ بورڈ کرتو آرہیو ہے ہور اگے وی یوہ کم لڑی  
وار طور وریو جے گو۔

گو جری زبان کیوں ہے مچ پُرانی زبانوں بچوں ایک ہے اس  
 گلوں اس کا املاء کو مسئلو اتنو زیادہ نہیں جھڑو جے گما ہنڈی زبانوں کو ہے۔  
 گو جری املاء ماں ہم نے گو جری ڈکشنریاں توں فائدہ چکیو ہے جھڑی جے  
 کلچرل اکادمی یا دو جا اداراں نے چھاپی وی ہیں۔ ہم نے اس ماں نچھو  
 زبان پیش کی ہے تے گو جری کو مرکزی روپ وی اُبھارن کی کوشش کی ہے۔  
 اسٹیٹ بورڈ آف سکول ایجوکیشن ڈاکٹر جاوید راہتی (کنوینر  
 گو جری زبان) تے دو جا ادیبیاں تے اُستاداں جن ماں جان محمد حکیم محمد  
 امین انجم، چودھری عبدالمجید تے چودھری محمد اسلم شامل اس کو شکر گزار ہے کہ  
 اُن نے بورڈ ماں منعقدست دھیڑاں کی ورکشاپ ماں گو جری کی چھیویں،  
 ستمیں تے اُٹھمیں کی درسی کتاب ”شکر بنائیں ہیں ہور اس کو پہلو دو جوتے  
 آخری ڈرافٹ بنا کے ان ناں کتابی شکل ماں باندے آئیو ہے۔  
 اس کتاب کی ترتیب ماں ہوں بورڈ کا عملہ کو وی شکر یو  
 جے اُن نے اس کم ناں خوش اسلوبی نال توڑ چاڑھیو ہے ہور یوہ  
 خواب پورو ہو سکیو ہے۔ بورڈ کمپوزنگ تے ڈیزائننگ واسطے عبدالواحد  
 منہاس ہوراں کو بھی شکر گزار ہے۔

اٰخیر ماں یوہ دسنو ضروری ہے کہ اُن تمام اُستاداں ناں یوہ حق  
حاصل ہے کہ جہڑا اس کتاب ناں پڑھاویں گا کہ ویہ اس ناں ہور چنگوتے  
طالب علماں واسطے سرس بنان واسطے اپنا مشورہ نال نوازیں، تاں جے اُن  
کے ذریعے آتا ایڈیشن ہوروی سرس بنایا جاسکیں۔

پروفیسر وینہ پنڈتا  
چیئر پرسن اسٹیٹ بورڈ آف سکول ایجوکیشن







## دُعا

ہتم پر کون آسمان ٹکا وے اِتو دَس  
کہڑو انبروں بدن برھاوے اِتو دَس

دھرتی بچوں پنڈر آنویں نیلی شے  
کون اُنھاں نا باہر لیاوے اِتو دَس

کون مٹی کا بُت ماں آن کے بھاوے ساہ  
فر مٹی ماں آن ملاوے اِنُو دَس

ٹھنڈی ٹھار کرے دھرتی نا رات کی ٹھنڈ  
دن نا کس را گرم کراوے اِنُو دَس

رنگ برنگا پھلاں کی بُو باس حکیم  
اِس دھرتی نا کون سجاوے اِنُو دَس

(جان محمد حکیم)



## 1- لفظ تے اُن کا مطلب

انبروں	:	اسمانوں
پنگر	:	زمین بچوں کسے نیلی چیز کو جم کے باہر آؤ۔ جمنو
ساہ بھانو	:	زندہ کرنو۔ پیدا کرنو
ٹھنڈی ٹھار	:	متی ٹھنڈی پالو
مٹی ماں ملانوں	:	ختم کرنو
رنگ برنگا	:	ستارنگاں کا، مچ رنگاں کا
بُو باس	:	خوشبو، سوہنی بو

## 2- سوالات:

- (۱) تھاری زمین نا کون کھلو کرے؟
- (۲) بندہ کو مٹی نال کے رشتو ہے؟
- (۳) شاعر نے خدا کی کن کن خوبیاں کو ذکر کیو ہے؟
- (۴) اس نظم ماں شاعر کے پیغام دینو چا ہوے؟
- (۵) اس نظم کا لکھن آلا شاعر کون لکھو۔

## مولانا مہرالدین قمر

راجوری کی دھرتی نامان ہے اپنا اُن ست رنگیاں پھلاں پر جہاں نا  
اس نے لوری دے کے جوان کیوتے ویہ اپنی دھرتی ماں کی لاج واسطے اپنی  
جان تلی پر دھر کے جھکھڑ جھولاں کو مقابل کرتا رہیا۔ اُنھاں نے اپنا ساہ  
کاتند واں کی پرواہ نہیں کی بلکن دھرتی ماں کا مان بڈیار کا سچیا رنا اُچور کھن  
واسطے جان، مال دولت سب کجھ تچ دتو۔ اُنھاں نے اپنی اکھیں اس دھرتی پر  
ظلم تے نا انصافی کی کھیڈاں کو نظارو ڈٹھوتے اس کانگ ماں کئی بے گناہ تے  
معصوماں نارڑھتاں دیکھیو۔ جاگیر داری تے شخصی راج کی اس کانگ ماں اُن  
گنت بیڑیں غرقاب ہو گئیں۔

تقدیر کی یہ کھیڈ کچا تے پکائند واں ہاروں ٹپتی تے بکتی رہیں تے بھامل  
بھوسا کھاتی دھر گھسٹی زندگی کا اوکھا لمیراں پینڈاں کو کدے انت نہیں لہر رہیو

تھو۔ کوئے جیالو ہی ان کچا تندواں کی ڈور بٹ کے زندگی کی ماہل بنا کے تاریخ کی سُتھری تے تھی وی پُونیاں ناگت کے تانؤ پیٹو تیار کر کے اسی بیڑیاں کو ملاح بن سکے۔ قوم اسا پوتاں پر ہمیشاں مان بڈیار کرتی رہ۔ ان جیالاں نے دھرتی ماں کا سینہ پر اپنؤ لہو نچوڑ کے اس کا مان بڈیار نا بدھا پوتے اکھاں کا بانپھلن نچوڑ کے زمانہ کی بے مہریاں کی میل نا دھویو۔ اُنھاں نے جس دھسکتی اگ نا کسیر پوتھواج واہ بھامبڑی مار رہی ہے۔

پنجالاں کی بکل ماں بسی قدرتی حُسن نان دھوئی دھائی راجوری کا گراں، مرگاں ڈھنڈکوٹ کی دھرتی نا کتنؤ بڈیار ہووے گو جس نے اپنی جھولی ماں ۹ جولائی ۱۹۰۱ء ماں چودھری جعفر علی اوانہ کے گھر پیدا ہو یا مہر الدین نالوریں دتیں تے سوچو بنا کے جو انٹرو کیو جس نے زندگی کا پل پل نا مٹھن پر کھن کو سلیقو سکھ لیوتے اس سلکھنی دھرتی پر ہون آلا پھیر پرتاں نا سمجھ لیو۔ ذیلداری، شاہوکاری تے جاگیرداری نظام نے ہر پاسے اپنا بسلا دند کھایا وا تھاتے مظلوم قوم اس کا بس توں بے بسی کی زندگی جی رہی تھی۔ چودھری جعفر علی نے اپنا پوت مہر الدین نا دینی تے رسمی تعلیم دوان واسطے ڈھنڈکوٹ ماں ایکن بزرگ مولوی محمد حسین کول ٹور جو جھاں نے اُن کا ذہن نا چنگی طرح کھنگا لیو۔ اُس توں بعد

ویہ دہلی تے پنجاب کا مدرساں ماں پڑھن چلیا گیا تے تعلیم کی اس ہوانے اُن کا ذہن کا بوہاں نا اسو کھو لیو جے دھیاری رات نا انصافیاں نا اُکالن تے ظلم کو مقابلو کرن واسطے اپنی سوچاں کا گھمن گھیر ماں اُلجھیا رہیں تھا۔ قوم کی بد حالی نا دھیان ماں رکھتاں اُنھاں نے ۱۹۳۹ء ماں پیغام قمر کا ناں سنگ ایک کتابچو چھاپو تھو۔ لکھن کی یاہ بھٹک ساری عمر رہی پر اُن کی مچ ساری لکھت دیتاب نہیں ہیں۔ اُنھاں نے قریباً ستائی کتابچہ لکھیا ہیں تے کئی جگہ بتری کتابچاں کی گل بھی لکھی گئی ہے۔ اُنھاں کو منظوم گو جری کلام بھی کتابچاں کی شکل ماں چھپ چکیو ہے تے اُنھاں کو خیر و پنجابی تے گو جری کلام حضرت میاں بشیر احمد لاوری نقشبندی ہوراں نے ”نیر سمندر“ ماں چھاپو ہے۔ لکھتاں کے مطابق اُن کو اجاں بھی خیر و کلام چھپن کی اڈیک ماں ہے پر پتو نہیں وہ ہن کتابی شکل ماں باندے آسکے گویا نہیں۔

قمر صاحب دل کا بڑا نرم تے ہمدرد انسان تھا۔ کسے بھی غریب، لاچار تے قضیاں کا ماریا بندہ نا دیکھ کے اُن کے اندر ایک درد جاگ اُٹھے تھو۔ ویہ درد کی دوا کو جت چارو کریں تھا اُتے ہی اُس کی جرٹ نا بھی کھنوترن کی کوشش کریں تھا۔ قمر ہور قوم ماں بکھیڑو تے آپسی جھگڑاں توں سخت پریشان ہونویں تھا کیوں جے ویہ

یوہ سمجھیں تھا اس مندی عادت ناں قوم ماں نا اتفاقی پیدا ہوئے تے ترقی کی ساریں راہ بند ہو جائیں۔ اصل ماں بربادی کی جڑیہ ہی ہے۔ اُنھاں نے اپنی لکھتاں کے ذریعے قوم بچوں اس خو خصلت نا کالن پر زور دتو۔

قمر کی شاعری تے دوجی لکھت کئی رسالاں تے اخباراں ماں بھی چھپتی رہی جن ماں ”گجر گونج“ تے سروری کسانہ کی اخبار ”نوائے قوم، تے رسالہ ”گوجردیس“ خاص طور پر قابل ذکر ہیں۔ قمر واسطے راجوری کی دھرتی سہکتی رہی وراں کی آخری آرام گاہ مانسہرہ پاکستان ماں بنی۔ اُنھاں نے ۱۹۷۶ء ماں اپنے وطنوں دُور دیس ماں زندگی کو چھیکڑ کو ساہ لیوتے مناں مٹی بیٹھ اوہلے ہو گیا پر اُن کے بے قرار روح راجوری وانگت تے وطن کیاں ماہلیاں، شنگراں تے ڈھوکاں بہکاں ماں چھڑکتی رہی۔

قمر راجوری بھی اپنی لکھتاں ماں ہمیشاں زندہ رہیں گاتے اُن کا کم اُن کی یادنا سحر ورکھیں گا۔ اُن کی شاعری تے نثر دوائے آتی نسلاں کی رہبری کرتی رہیں گی تے ظلم نا انصافی تے بکھید کی تندی ناٹورن واسطے جھنجھوڑتی رہیں گی۔

قمر راجوری کا جد امجد میاں محرم اوآنہ تھاتے اُن کا دوپوت تھا میاں مٹھاتے میاں رسمت۔ میاں رسمت کی اگے کائے اولاد نہیں تھی جد جے میاں مٹھا کا

ترے پوت تھا۔ میاں مٹھا کا بڈیرا پوت میاں کامل اوانہ کامیاں تاج الدین تے  
 اُن کا سلطان محمد تھا۔ سلطان محمد کاست پوت تھا جن بچوں اکیں کوناں جعفر علی تھو  
 جن کی اگے اولاد ماں ترے پوت تھا۔ اُن کا ناں مہر الدین، جلال الدین تے ولی  
 محمد۔ مہر الدین ہی بعد ماں مولانا مہر الدین قمر راجوری کا ناں سنگ مشہور ہو یا۔  
 ویہ ۱۹۲۸ء ماں بنائی گئی گوجر جاٹ کانفرنس کی راجوری شاخ کا چودھری دیوان علی  
 کھٹانہ کے ناں سجوہتھ بن کے سرگرم کارکن رہیا۔ ویہ ۱۹۴۷ء کا غدر توڑی اس تنظیم  
 سنگ جڑیا رہیا تے کئی جلساں ماں شرکت کی۔

(چودھری حسن پرواز)



## 1۔ لفظ تے اُن کا مطلب

بُگل	:	بکھی پاسو
بڈھیار	:	ناز، مان
سلکھنی	:	سوہنی، چنگی
بسلو	:	زہر آلود، بسیں آلو



گھمن گھیر : پانی کو چند رہا رو پھرنو  
 لکھت : ادبی تحریر  
 کتابچہ : گھٹ صفحات آلی کتاب  
 اوہلے : چھپیو وو ہو تو، جھڑو باندے تہ و حلے

## 2- سوالات:

- (۱) مولانا مہرالدین قمرکت کارہن آلا تھا؟
- (۲) مولانا مہرالدین قمر نے ابتدائی تعلیم کتوں حاصل کی؟
- (۳) مولانا نے ذیلداری نظام کے خلاف قوم نا کھلو کرن واسطے کے کیو؟
- (۴) مولانا صاحب نے گل کتنا کتابچہ لکھیا؟
- (۵) مولانا قمر کی لکھت کہیڑا کہیڑا اخباراں ماں چھپی ہیں؟
- (۶) مولانا مہرالدین قمرکت دفن ہیں؟

## 3- لفظاں نا جملاں ماں برتو۔

کھنگالو، بوہو، بالنو، گھمن گھیر، نمیکلاں، چھاپنو، کھنوترنو



## توی

اُتر پہاڑوں آئیے توئیے      منوں درد سنائیے توئیے  
باہو باغ نون تکے  
توں توئیے نہ بگنو تھکے  
کون تیری لہراں نون ڈکے  
شونکے راج جگائیے توئیے  
کنڈھے تنجھ کے ڈیرو لایو  
جھگو تنجھ کے کول بسایو  
جموں گجر نگر بنا یو

میرو دل تڑفایے توئے  
بابا جیون شاہ کی ندیے  
ستواری کا راہ کی ندیے  
ابراہیمؑ بابا کی ندیے  
گیت پیار کا گایے توئے  
تیرے کندھے میری ڈھاری  
تکوں تیری ٹھاٹھ نیاری  
فتح علی نوں جنڈوں پیاری  
ڈھویے پیرھ پرایے توئے  
اُتر پہاڑوں آئے توئے

(فتح علی سروری کسانہ)



## 1- لفظ تے اُن کا مطلب

شونک : واہ آواز جھیرٹی دریا کا چلن نال آوے

کنڈھو : دندو

تنجھ : تیرو۔ تھارو

جھگو : جھگی، گھاہ کو بنیو گھر، گلو

ڈھاری : نلو گھر، جھگی

ٹھاٹھ : شان

جند : جان

پیر : درد، دُکھ

## 2- سوالات:

(۱) توی نظم کا شاعر کونسا لکھو؟

(۲) توی نظم کو خلاصو لکھو؟

(۳) توی نظم ماں کن روحانی بزرگاں کا ناں درج ہیں؟

(۴) گجر نگر کو توئی نالن کے رشتو ہے؟

(۵) شاعر ناتوی نندی کیوں پیاری ہے؟

### 3- خالی جگہ پُر کرو۔

(۱) اُتر پہاڑوں..... توئیے

(۲) جموں گجر..... بنائیو۔

(۳) ستواری کا..... کی ندیے۔

(۴)..... کنڈھے میری ڈھاری۔

(۵) دھویئے..... پرائیے توئیے۔

(۶) گیت..... کا گائیے توئیے۔



## پانی

زندہ رہنے واسطے ہواتیں بعد پانی سب تیں متوضوری ہے۔ یاہ خدا کی ایک سچ بڑی نعمت ہے۔ پانی کا متا سارا فائدہ ہیں۔ پانی پینے کے کم آن کے نان نان روٹی بنان، کپڑا دھون تے نہان واسطے بھی برتو جائے۔ مال چوکھر بھی پانی پی کے زندہ رہیں۔ پانی گی وجہ تیں ہم پھل، پھل، سبزیاں تے کھان پین گی دو جی غذا پیدا کراں۔ پانی کے بغیر ہم زندگی بسر نہیں کر سکتا کیوں جے پانی ہوے تاں ہم اپنا گھر کوٹھابناں سکاں۔ ہم لوکاں نا پانی کی سچ ساری قدر کرنی چاہیے۔ ہور پانی کو بھلتو برتو کرنو چاہیے۔ پانی زمی باڑی واسطے بھی برتو جائے۔ جن جگہاں پر بارش ویلے سر نہیں ہوتا ات کو ہلاں گے ذریعے پانی برت کے ہم چنگی

فصل بیچ سکاں۔ بدلاں کا موسماں ماں بارش گو پانی سننجاں کے رکھنؤ چاہے تاں  
جے اس ناویلا پر برتیو جائے سکے۔

پانی کدے بھی ضائع نہیں کرنؤ چاہیے کیوں جے یاہ اک بڑی قیمتی نعمت  
ہے۔ پانی گی قدر تے قیمت وھے لوک چنگا طریقہ سنگ جانیں جھڑا اس نعمت  
تے محروم ہیں۔ اس گی مثال راجستھان جیسا علاقہ ہیں جت پانی کی سروں ہی  
بڑی قلت رہ ہم نا تالا باں دریاں تے کوہلاں گو پانی بھی صاف ستھر و رکھنؤ  
چاہیے۔ ہم نا تالا واں تے کولاں کے دندلے کپڑا دھون تیں پرہیز کرنؤ  
لوڑیئے کیوں جے ایسو کرن سنگ پانی کو تھرو ہو جائے۔ جس ناں طراں طراں  
کی بیماری لگ سکیں۔



## 1- سوالات:

- (۱) زندہ رہن واسطے ہواتے بعد ضروری کھیرٹی چیز ضروری ہے؟
- (۲) پانی کاں کاں واسطے کم آوے؟
- (۳) سر لگے زمی باڑی کس را کی جائے؟

- (۴) پانی کو تھرو ہونے میں کس طرح بچایو جائے؟
- (۵) ہم ناپانی بچانوں کیوں ضروری ہے؟

## 2- مناسب جوڑ سنگ مکمل کرو:

- (۱) پانی..... کے ذریعے آبپاشی کی جائے۔
- (۲) نہراں..... خدا کی بڑی نعمت ہے۔
- (۳) راجستھان..... گو پانی سنبھال کے رکھنؤ لوڑے۔
- (۴) تالاب..... گا لوگ پانی کی قدر چنگا طریقہ سنگ جانیں۔
- (۵) بارش..... کپڑا دھون سنگ پانی کو تھرو ہو جائے۔



## میاں نظام الدین لاروی

پیدائش ۲۵ مارچ ۱۸۹۶ء وانگت کشمیر۔ وفات ۱۰ نومبر ۱۹۷۲ء وانگت کشمیر۔  
تاریخ گواہ ہے جے دُنیا ماں ہمیشاں اُسے زبان نے باہدو کیو جس نا  
سرکاری ڈھائی نصیب ہوئے۔ ریاست بہویں صدی کے نال ہی جدید گوجری  
ادب چڑھت کے چچھے وی اک درویش بادشاہ کو ہتھ تھو جس نے اپنی مادری  
زبان اپنا دربار کی سرکاری زبان بنا کے رکھی۔ اس شہنشاہ نا دُنیا بابا جی صاحب  
لاروی کاناں نال جانیں۔ میاں نظام الدین ہور بابا جی صاحب کافر زندہ تے  
جانشین تھا۔ سلسلہ نقشبندیہ کا روحانی بزرگ ہون کے نال نال ریاستی سیاست  
تے ادب ماں بھی نظام الدین لاروی ہوراں کو بڑا اچو مقام ہے۔ گجراں نا غریبی  
کی حالت تے کڈھ کے عزت دار قوماں کی صف ماں لیاں واسطے میاں نظام  
الدین لاروی، چودھری غلام حسین لسانوی، حاجی محمد اسرائیل کھٹانہ، چودھری  
دیوان علی تے مولانا مہر الدین قمر ہوراں نے موہنڈا نال موہنڈو جوڑ کے کم کیو۔

اُن نے جھیڑی گجر جاٹ کانفرنس بنائی تھی اُس کو ریاستی گجراں کی تاریخ ماں بڑو  
 اہم رول رہیو ہے۔ ویہ مُلک کی تقسیم تیں بعد کنیں سال توڑی ریاستی قانون  
 ساز اسمبلی کامبر بھی رہیا ہیں تے اس طرح اپنی قوم کی سیاسی خدمت بھی  
 کرتا رہیا ہیں۔

ابتدائی دور کا مچ سارا گوجری لکھاڑیاں ہاروں میاں نظام الدین لاوری  
 ہوراں کو بھی زیادہ کلام پنجابی سی حرفی کی صورت ماں ہے۔ جھڑو ”اشعار نظامی“ کا  
 ناں ناں شائع ہو یو ہے۔ گوجری ماں اُنھاں نے تھوڑو لکھیو ہے پر معیاری تے  
 مثالی لکھیو ہے۔ اُن کا کلام ماں روحانی کیفیات تے تصوف کا پہلو نمایاں ہیں۔



زندگی ماں اکثر روئیں ہوئیں تھاتے رون نافرمان اپنی وراثت سمجھیں تھا۔ اُن کا  
 دربار ماں اکثر ادبی محفل لگیں ہوئیں تھیں۔ جن ماں سائیں قادر بخش، خدا بخش  
 زار، مولانا محمد اسماعیل ذبیح، مولانا مہر الدین قمر، اسرائیل اثر اقبال عظیم  
 جہیابڑا گوجری شاعر کلام پڑھیں تھا۔ تے ان گلاں توں اُن کی علم کی قدر دانی کو  
 انداز ولا یو جاسکے۔

میاں نظام الدین لاروی ہوراں کو وصال ۱۹۷۲ء ماں بابانگری وانگت ماں  
 ہو پوتے اُتے جی صاحب کا پہلو ماں دفن ہیں۔ اُن کی علمی و ادبی تے سیاسی  
 وراثت کو حق اُن کا صاحبزادہ میاں بشیر احمد لاروی ہوراں نے خوب نبھایو ہے  
 تے یوہ سلسلو اجاں بھی جاری ہے۔

(ڈاکٹر رفیق انجم)



## 1۔ لفظ تے اُن کا مطلب

چڑھت : اُوچائی

پیوئیں : اُنی تیں بعد کو ہندوسو

مندى : برى، چنگلى كو اُلٲھ  
بانہہ جوڑى : ہتھ ملاكے  
منڈلا : موہرا كا  
اصلاح : شاعرى كے بارے صلأح لىنى

## 2- سوالات:

- (1) حضرت مىاں نظام الدىن لاروىؒ كى پىداىش كت ہوئى؟
- (2) حضرت مىاں نظام الدىن لاروىؒ كا دور كا دو جا شاعراں كا ناں لكھو؟
- (3) حضرت مىاں نظام الدىنؒ كہىڑا روحانى سلسلہ نالؒ جُڑا وا تھا۔
- (4) مىاں نظام الدىن لاروىؒ نے كہىڑى تنظىم بنائى جس ماں گجرتے جاٹ شامل لوك تھا؟
- (5) مىاں نظام الدىن لاروىؒ كو اوصال كد ہو يہ تے وے كت دفن ہىں۔

## 3- لفظاں نا جملا ماں برتو۔

نقشبندىا، روحانى، سرحرفى، بابانگرى



## بن

بچو! مھاری ریاست جموں و کشمیر بناں نال بھری وی ہے۔ مھارا گوجر، بکر وال قبیلہ بچوں مچاں ڈیراں گوبسیر و جنگلاں (بن)، جاڑاں، بناں تے ڈھوکاں ماں ہے۔ مھارا لوکاں کی زندگی تے اُن کا مال چوکھر کو گھاہ پتر بھی انھاں ہی پہاڑی علاقہ بچوں حاصل ہوئے۔ مھارا ماحولیات کو سارو نظام جنگلاں تے بناں کی وجہ تیں ہی چل رہی ہے۔ جنگل مھاری زندگی ماں نہ صرف روٹی پانی واسطے مددگار ہیں بلکن آکسیجن خاص کر صاف ہوا واسطے جنگل (بن) مھاری مدد کریں۔

بن قدرت کو اک تحفو ہیں۔ جھیر ابدلتا موسماں واسطے ماحول تیار کریں تے اس زمین پر زندگی کی موجودگی کو باعث ہیں۔ جنگل توں ہم ناں نہ صرف لکڑی بلکن گھاہ پتر، جنگلی جڑی بوٹیں تے دوجی چیز حاصل ہویں۔ جھیر جے مھاری

زندگی ناٹورن واسطے مدد دیں۔

جموں و کشمیر ماں جنگلات قریباً قریباً ہر ضلع تے پہاڑی علاقوں ماں جھیرا مشہور بوٹا بنوں ماں لہھیں انھاں ماں دیار، چیر، سروں، بیڑ، تنگ، بری، بانس، بن کھوڑ تے کنیں دوجا بوٹا بھی شامل ہیں۔ جنگلی جڑی بوٹیاں ماں گٹھ، ریوند، چورو، گوگل، پتریس تے دوجی جڑی بوٹیاں شامل ہیں۔ جن نا انساناں تے مال چوکھرا کا علاج واسطے برتو جائے۔

بنوں ماں جنگلی جانور بھی اُس کی خوبصورتی نا چارچن لانیوں۔ جموں و کشمیر کا جنگلاں ماں ہرن، باراں سنگو، سہیں، چترو، رچھ، گدڑ، نیل گاں، مور، بن کوکڑ پایا جائیں۔ ان گے علاوہ جنگلاں (بنوں) ماں بکھ بکھ طراں کا گھاہ تے دوجا جنگلی میوے دار بوٹا پایا جائیں جس طرح جے گچھ، جمون، بن کھوڑ تے دوجا۔

جنگلاں (بنوں) توں ہم لکڑی، غذا، ہوا، جڑیں بوٹیاں تے مال چوکھراں واسطے چارولہھے۔ بن مھارا گوجر بکر والاں واسطے دوجو گھر ہیں۔ ڈھوکاں، بہکاں تے سبززاراں ماں زندگی گزارن آلا مھارا قبیلہ جنگلاں (بنوں) پر ہی دار مدار رکھیں۔ جنگلاں (بنوں) کا اچا شنگراں پر مانیاں کا جمع ہون کی وجہ نال دریاواں ماں ساروسال پانی بگتورہ۔

ہم نا جنگلاں ناتے اس کے اندر کا سرمایہ نا بچان واسطے اگے آنو پے گو  
 تاں جے آن آلی نسلان نا اس توں اگاں بھی فائدو لبھورہ۔ ہورنواں بوٹا  
 لان نان نوا جنگل (بن) بھی تیار کرن گی سخت لوڑ ہے۔ تاں جے نواں  
 ذریعہ لوڑیا جاسکیں۔

(ڈاکٹر جاوید راہی)



## 1۔ لفظ تے اُن کا مطلب

بسیرو	:	ٹھکانو، رہن کی جا
ڈیرا	:	کُنبو
ماحولیات	:	مھاراکولن کال کو ماحول
باعث	:	وجہ، ذریعو
ٹورن	:	چلان
چارچن لانا	:	سُنھپ بدھانو
سبزہ زار	:	نیلاتلا

## 2- سوالات:

- (۱) گوجراں کا ڈیراں کو بسیر و زیادہ تر کت ہوے؟
- (۲) جنگلاں (بناں) توں ہم نا کے کے لبھے؟
- (۳) بناں کا کجھ اک ناں دسو؟
- (۴) جنگلی جانوراں بچوں کوئی چار کوناں لکھو؟
- (۵) جنگلی جڑی بوٹیاں کا ناں گنواؤ؟
- (۶) جنگل بچاناں کیوں ضروری ہیں؟

## 3- پڑھو تے سمجھو۔

جنگل، ڈھوک، بیک، پتریس، شنکر



## مزاحیہ نظم

### راجو کا ٹھہلا

راجو پکڑ سکول چلا یو قاعدو مکو دوجی لایو  
گھر ماں تھوڑو جہیو کم آیو راجو موڑ مھسیاں پر لایو  
سکولوں باپ ہٹاتو نہ  
راجو ٹھہلا کھاتو نہ  
باپ نا چسکو ددھ کو آوے پھرڑی بیچے لاری لیاوے  
کمی لگی تے قرضو چاوے نہ مگے تے زمی بکاوے  
ایویں چسکا لاتو نہ  
راجو ٹھہلا کھاتو نہ  
گھر کو دولت مال مکایو نکا جہیا کو بیاہ کرایو

جس دم شیرو ہوش ماں آہو وہ چھوڑی تے ہور لیا ہیو

بیاہ ور مال اڈاتو نہ

راجو ٹھہلا کھاتو نہ

باپ راجو کو بڑو پکھنڈی بولیو کوئے تے چالی ڈنڈی

ننھی عدالتاں وچ ترنڈی پئی تماشہ دیکھے منڈی

وکیلاں کول لٹاتو نہ

راجو ٹھہلا کھاتو نہ

گھر نہیں آٹو گھاہ تے اوکھر اڈپڈ گیا راجو کا چوکھر

اج اس کو کل اُس کو نوکر کھانی پئی در در کی ٹھوکر

ہتھوں وقت کھراتو نہ

راجو ٹھہلا کھاتو نہ

(شاعر: فضل حسین مشتاق)



## 1- لفظ تے اُن کا مطلب

- چسکو : عادت، بھٹک  
پھرڑی : دُدھ نہ دین آلی مھیس یاگاں  
لاڑی : دُدھ دین آلی مھیس یاگاں  
پکھنڈی : فریبی  
اوکھر : اوہ گھاہ جہڑ و مال کھان توں بعد چھوڑے  
چوکھر : مال ڈنگر

## 2- سوالات:

- (۱) راجو کا ٹھہلا نظم کو خلاصہ لکھو۔
- (۲) راجو کا ٹھہلا نظم کس نے لکھی ہے؟
- (۳) راجو کا ٹھہلا نظم ماں کے پیغام دتو گیو ہے؟
- (۴) راجو کو باپ کیسو جنو تھو؟
- (۵) راجو نا باپ نے سکولوں کیوں ہٹا یو؟

## 3- ان لفظاں نا اپنا جملاں ماں برتو۔

دوجی، مھیس، ہوش، قرضو، ٹھہلا، گھاہ، اوکھر

## چٹھی

اُمید ہے تم چندک ماں خیریت ناں ہویں گا۔  
ٹیلی فون اوپر ہر دھیارے ملائی وھے، وٹسپ تے فیس بک پر تھارے  
ناں گل ساخھی کرن کو موقع ملے۔ پر ان نال اکھاں گوج سار و ناس ہوے۔  
بھلا جھڑ و مزو چٹھی لکھن تے پڑھن ماں ہے وہ میڈیا کا اس مواصلاتی نظام ماں  
کت لھب سکے۔ تم جد چٹھی لکھیں تے تھاری تصویر اکھاں کے موہرے پھرتی  
دے۔ بزرگاں نے سچ کہیو ہے جتنو مزو ہجر ماں اتنو وصال ماں نہیں ہوتو۔  
تھاری ٹوری وی پھل بھی چٹھی میرا تک پہنچ جائیں۔ جھیرا مھاری فیس بک  
جتن کر گے بھی میرا تک نہیں پہنچا سکتا۔ ڈاک آلو جنو واقف ہے تے یاہ  
واقفیت تھاری چٹھیاں ہی کی وجہ سنگ ہے۔ ہوں تھاری چٹھی آن تو بعد ہی  
اپنی چٹھی لکھوں۔ گل کرتاں گل بدھ گئی۔ حالات نے مساں سکھ گوساہ لین

دُتو پر متاثر ضرور کیو۔ پچھلا کئی عرصہ تو اشاعت گو موقعو نہیں ملیو۔ چھ کتاب الماری گا ایکن خانہ ماں پچھلا پنجاں براں تیں چھین گی منتظر ہیں۔ کئی یار بلی ضد کریں پر پلے اک پیسو نہیں۔ سچ کہیں پیسو وہ جھیر و پلے گل واہ جھیرٹی چلے۔ اللہ کرے یاہ چھاپن کی حسرت ساہ نکلن تے پہلاں پوری ہو جائے۔ وادی کشمیر، راجوری، پونچھ تے خطہ چناب کا دوستان کو کلام فیس بک تے وٹسپ ماں دیکھنو پے۔ پرنٹر کی مچ ضرورت ہے۔ مہارالکھاڑی وی شاعری پر کد کد گے پویں ورنتر آ لے پاسے دھیان نہیں دیتا۔ کم گے بدلے ناں کمان گوشونق رہ۔ اللہ جنت بخشے نسیم پونچھی صاحب ناکتو بڑو کم کر گیا ہیں۔ کم ہوئے تے ایسو۔

نثر کی اک علیحدہ کانفرنس ہونی چاہیے۔ تے ہر قلم کار نا نثر کی دوڑ ماں اگے آ کے کم کرنو چاہیے۔ یاہ کمزور قلم کاراں واسطے اک چیلنج وی ہے۔ مہارو اج گوشاعر رات جمیو تے سرگی نا شاعری شروع کر دیے۔ پڑھتو مول نیں۔ ادب واسطے ذہنی بالیدگی ضروری ہے۔ خیر ہور سناؤں جے اجکل قدرتی بلاواں تیں ہی جان نہیں چھڑکتی ات بھکم ات سلاب آویں۔ ہور ہر دھیان گے کجھ حادثہ، جان عذاب ماں پھسی رہ۔ کجھ اک وقت بچے وہ لکھن

کاری ماں گزرے اُس ماں بھی ذہن انکا انکا رہ بھلا ایسا حالات ماں کے  
لکھیو جاسکے۔

میری لکھت پر ضرور لکھیو۔ تمہاری چٹھی کو اڈیکوان۔

تمہارو اپنو

شریف افتاب



## 1۔ لفظ تے اُن کا مطلب

باندے باچھڑ آنو	:	تصویر اکھاں کے موہرے پھرنی
آرام گوساہ	:	سکھ کو ساہ
شرم	:	بلغیت
زلزلو، بھونچال	:	بھکم
جوش و جذبہ سنگ کم کرنو	:	کد کد کے پیو

## 2- سوالات:

- (۱) آج کا موصلاتی نظام ماں چٹھی کی اہمیت کے ہے؟
- (۲) چٹھی و تبصروا کرو؟
- (۳) اس چٹھی ماں کن کن ناگہانی بلیات کوذکر کیوگیو ہے؟
- (۴) ادب کی کہیڑی قسم پر قلمکاراں نے اس سبق کے مطابق گھٹ کم کیو ہے؟
- (۵) چٹھی ماں کے چھاپن کوذکراے؟

## 3- خالی جگہاں نا پُر کرو۔

- (۱) جتنو لطف..... ماں ہے اُتنو خون ماں نہیں۔
- (۲) چٹھی ہم..... محکمہ کے ذریعے آراں پراں ٹوراں۔
- (۳) مھارا کجھ قلم کار..... پر زیادہ زور دیں۔
- (۴) قلمکاراں نا شاعری کے ناں ناں..... پر زور دینا چاہیے۔
- (۵) میری لکھت..... لکھیو۔

## انٹرنیٹ

انٹرنیٹ دُنیا کو سب تیں بڑو کمپیوٹرنیٹ ورک ہے۔ اس کی مددسنگ دُنیا کا کروڑاں لوک سیدھا طور پر آپس ماں جڑسکیں۔ انٹرنیٹ کی سب تیں بڑی خاصیت یاہ ہے جے تم گھروں بیٹھاں منٹاں ماں اس نظام کی مددناں کسے بھی اجیا بندہ ناں جڑسکیں جہیڑو تھارے ہاروں ہی اس نظام سنگ جڑیو ہوئے بھانویں دور ہی بیٹھوؤ ہوئے۔ اِنج کا دور ماں انٹرنیٹ کی مددسنگ تھارو پرسنل کمپیوٹر (PC)





یا لیپ ٹاپ یا موبائل ہی، ایک طراں کو، ٹیلی فون، ٹیلی ویژن، ریڈیو، ڈاک خانوتے لائبریری بن گیا ہیں۔ انٹرنیٹ نابرت کے تم ہُن اُن تمام چیزاں کا فائدہ اپنا کراماں بیٹھ گے چاسکیں جہڑی پہلاں لکھاں میل دور ہویں تھی۔

اگر ارج تم امریکہ کی کسی لائبریری ماں کسے خاص مضمون کی خاص کتاب کا گجھ سبق نقل کرنو چاہویں تاں تم اپنا کمپیوٹرگی مدد سنگ انٹرنیٹ کے ذریعے اس لائبریری ماں داخل ہو سکیں تے یاہ مخصوص کتاب پڑھ سکیں۔ اتنو ہی نہیں اگر تم دنیا کا کسے بھی ملک کو نظام دیکھنو چاہویں تاہ یوہ بھی انٹرنیٹ کے ذریعے ممکن ہے تے اس واسطے کتے جاون کی کائے لوڑ نہیں ہے۔ تم کمپیوٹر کا چند بیڑا دبا کے وہاٹ ہاؤس گواندرونی حصووی دیکھ سکیں دراصل انٹرنیٹ معلومات کو وہ خزانوں ہے جس گا ذخیرہ کو کوئی انداز نہیں۔



## 1- سوالات:

- (۱) انٹرنیٹ کے اے؟
- (۲) انٹرنیٹ کے سب سے بڑی خاصیت کے ہے؟
- (۳) کس نظام کی مدد سے لوگوں کو آپس میں سیدھا جڑ سکیں۔
- (۴) امریکہ جان کے بغیر واپس ہاؤس کی سیر کس طرف کی جاسکے؟

## 2- خالی جگہ پُر کرو۔

- (۱) انٹرنیٹ دنیا کو سب سے ..... کمپیوٹر نیٹ ورک ہے۔  
(چھوٹو/ بڑو)
- (۲) انٹرنیٹ کے ذریعے ..... افراد سیدھا طور پر جڑ سکیں۔  
(دو/ ہزاراں)
- (۳) انٹرنیٹ کے ذریعے امریکی صدر کو دفتر ..... جاسکے۔  
(دیکھو/ نہیں دیکھو)

## مان سر

ریاست کی سردیاں کی راجدھانی جموں توں مانسر 62 کلومیٹر کا چھنڈا پر ہے۔ پڑاں تے بناں کی جھولی ماں موجود یوہ سر قریباً ایک میل توں متو لموتے ادھومیل چھڑو ہے۔ پُرانیاں کہاوتاں تے کہانیاں ماں دسیو گیو ہے جے یوہ سر اپنا دوجا بھائی سروئیں سر نال جڑیو وّو ہے۔ ہندواں واسطے یاہ ایک متبرک تھاہ ہے جس کا کنڈھاں پر مچ سارا مندر بنایا گیا ہیں۔ جن بچوں گجھ ایک مچ پرانا ہیں جن ماں چھ سراں آلاسپ شیش ناگ کی پوجا بھی کی جائے۔



ریاست کاسیل سفا کا محکمہ نے اس سرناں سیلانیوں واسطے خاصی ترقی دتی ہے۔ جت سینکڑاں سیلانی ہر روز اس جگہ پر سیل کرن واسطے آنویں۔ اونٹ کی سواری، سر کے چو فیری کو چکر، چڑیا گھر اس کی خاص پہچان ہیں۔ چڑیا گھر ماں مقامی جنگلی جانوراں کے علاوہ ہرن تے رچھ بھی ات رکھیا گیا ہیں۔ اسکولی بچا بڑا چاہ ناں اس سیلانی مقام پر جائیں تے قدرتی نظاراں کو مزو لیں۔

مان سر کے نیڑے گجر بکروال قبیلاں کی بستی منڈ قدیموں ات موجود ہیں۔ یہ لوگ سر ماں ددھ چوا کے اُس ناصاف رکھن گو ہر دھیاڑے عہد کریں۔ مان سر کا کول کان کابناں ماں چیر تے دو جا جنگلی بوٹا لہیں۔ سکوا، فر لائی، خیر، جامن، گوگڑ جہیا بوٹا بھی مان سر کے ناں کابناں ماں پایا جائیں۔

سر کی اک بھکھی اک مسیت بھی ہے جس ماں پنچ گانا نماز ادا کی جائے۔ یوہ سیلانی مقام بکھ بکھ علاقاں تیں آیا لوکاں ناں مچ سوہنؤ لگے۔ سر ماں مقامی مچھیاں کی متی تعداد ہے۔ ہور سر کے آلے ڈوالے گوشت وغیرہ کھان کی سخت مناہی ہے۔



مانسراک پاساتوں اُدھم پورتے دو جا پاساتوں پٹھان کوٹ نال جڑیو وو  
 ہے۔ جیہڑو کہ ان دوہاں شہراں نا آپس ماں اک سڑک نال جوڑتو سہی لگے۔  
 مانسراکے اندر سیلانیوں واسطے کشتی چلائی جائیں۔ تاں جے ویہ سڑکواندروں  
 بیس کے نظارو کر سکیں۔



## 1۔ لفظ تے اُن کا مطلب

سر	:	جھیل، پانی کو متو بڑو تلا
چھنڈو	:	دوری
متبرک	:	مذہبی لحاظ سنگ متواہم
کنڈھا	:	چوفیری کو دندو
سیلانی	:	سیل کرن آلا
منڈھ قدیمو	:	پُرانا وقتاں توں
چوانو	:	باہنو
پنج گانہ	:	پنج وقتی

## 2- سوالات:

- (۱) مان سر جموں توں کتنا چھنڈا پر ہے؟
- (۲) پُرانی کہاوتاں ماں سروئی سر نال مان سر کو کے رشتو ہے؟
- (۳) مان سر ماں سیلانیوں واسطے کے کے دیکھن کی جاء ہیں؟
- (۴) مان سر کا گوجر سر ناں صاف رکھن واسطے کے کریں؟
- (۵) مان سر کا جنگلاں ماں کہیڑا کہیڑا اناں کا بوٹا ہیں؟
- (۶) مان سر ماں کس چیز کی پابندی ہے؟
- (۷) مان سر کن دو شہراں نا آپس ماں جوڑے۔

## 3- پڑھو سمجھوتے کرو۔

سر، کہاوتا، شیش ناگ، جنگلی جانور، قبیلو، شہر



## کاروبار

کاروبار دُنیا کو سب توں پُرانُو پیشو ہے۔ کاروبار کے ذریعے ہم کائے بھی چیز یا خدمت دو جاں توڑی کسے چیز یا پیسہ کا عوض ماں پوہچواں۔ کاروبار عام طور پر منافع و کمان واسطے کیو جائے۔

دُنیا ماں دو طراں کا کاروبار ہیں۔ ان ماں مُلک کے اندر کیو جان آلو کاروبار۔ مُلک کی سرحد اں تو باہر کیو جان آلو کاروبار شامل ہے۔ بھارت مُلک کے اندر تے باہر کاروبار واسطے دُنیا ماں مشہور ہے۔ ہم مچ ساریں چیز برآمد کراں جنھاں نا دُنیا کا بکھ بکھ مُلک خرید کے مہار ا مُلک نا امیر کرن ماں مہاری مدد کریں۔

ممبئی مہاراجہ کی کاروباری راجدھانی ہے۔ کاروبار کا بادھا واسطے سرکار  
 ہر سال دہلی سمیت بکھ بکھ شہراں ماں کاروبار میلا لو اوے۔ ہور کاروبار نا بادھو دین  
 واسطے بکھ بکھ قدم چاوے۔ کاروبار ناں بادھو دین واسطے مشہوریاں ناں وی برتیو  
 جائے جس کے ذریعے کسی خاص اشیاء نا بادھو دتو جائے۔



## 1۔ لفظ تے اُن کا مطلب:

منافو	:	نفعو
برآمد	:	باہروں آنئی
بکھ بکھ	:	الگ الگ
راجدھانی	:	مرکز
میلو	:	اکٹھ
بادھو	:	زیادہ کرنو
برتیو	:	بنڈنو



## 2- سوالات:

- (۱) کاروبار کا واسطے کیو جائے۔
- (۲) دنیا ماں کس طراں کا کاروبار مشهور ہیں؟
- (۳) کاروبار کے ذریعے ہم نا کے حاصل ہوئے؟
- (۴) سرکار کاروبار کا بادھا واسطے کے کے قدم چا وے۔

## 3- ان لفظاں نا برتو:

پیشو، ملک، سرحد، برآمد



## گجراں کو موسمی سفر

ڈاکٹر جاوید راہی

گوجر جموں و کشمیر ریاست کا ہر علاقہ ماں رہتا آنویں لگاوا۔ اسطراں گوجر، بکروال قبیلہ کی زبان اک ہی ہے بھانویں ویہ کتا کا بھی رہن آلا ہویں۔ گجر بکروالاں کا بکھ بکھ پیشہ ہیں جس طراں جے بھید، بکری، گھوڑا، مھیس، گاں پالنی، اونٹھ رکھنا، زمینداری کو پیشو کرنو شامل ہے۔ بھید بکری پالن آلا گجراں نا بکروال تے مھیس، گاں رکھن آلا گجراں نادودھی گجر کہیو جائے۔ اس قبیلہ گاں لوکاں نا اپنا مال مویشی کا گھاہ پتر واسطے اک جگہ تیں دوجی جگہ جانگی ہر سال لوڑ پے۔ یاہ لوڑ ان لوکاں نا چل پھر کے پوری کرنی پے تے اپنا قبیلہ سنگ دور دور ڈا گوسفر کرنو پے۔ یوہ سفر کدے گھٹ ہوئے تے کدے مچ لموتے اوکھورستو طے کر گے یہ لوگ اپنیاں ڈھوکاں، بہکاں تے مرگاں ماں پہنچ جائیں۔

گجر بکروال قبیلہ نا اپنا سفر ماں کئی دشوار گزار رستاں کا پینڈاں تیں گزرنو پے۔  
 رستاں کئی پڑا کرنا پئیں۔ کئی بار مال چوکر بھید بھاروں بدلاں، مانیاں تے  
 سیلاباں ماں موت کو شکار ہو جائیں۔ اپنا سفر گے دوران گوجر بکروال لوکاں ناچ  
 سارا پا پڑ بیلنا پویں ہو رکدے تس تے بھکھ گوسا منو بھی کرنو پے۔

یہ لوک دوائی کی جا جڑی بوٹیاں سنگ کم چلاویں تے کھان پین واسطے ستو  
 تے اس قسم کی مچ ساری غذا اپنے سنگ لے کے چلیں۔ سفر ماں چوراں تے  
 ڈاکواں کو خطر ورہ۔ کئی بار عید تے بیاہ شادی اپنا سفر کے دوران ہی مناویں۔ شنگر  
 دریا تے اوکھارستاں گا پینڈاں ان لوکاں گو مقدر ہیں۔ لیلہ، بگروٹا تے کٹیاں نا اپنا  
 موہنڈاں پرچک کے چلن آلی یاہ قوم اج وی خانہ بدوش ہے۔

گوجر بکروال لوک آپ تکلیف سہہ لیں پر جانوراں نا تکلیف نہیں ہون  
 دیتا۔ گرمیاں ماں لوک ماہلیاں، ڈھوکاں تے بہکاں ماں چلا جائیں۔ اُت مھیس  
 بھاروں سنگ وقت گزاریں گے سردیاں واسطے جن لوکاں کی اپنی زمین ہیں ویہ  
 اپنی زمیناں تے دو جاہ گجھ لوک کسے گرم جگہ سفر کریں۔ ان جگہاں ماں جموں  
 کٹھوعہ ریاستی، ادھمپور تے سانہ وغیرہ شامل ہیں۔ گجھ گجر ریاست پنجاب نا شرڈ  
 گا موسم ماں اپنو مسکن بناویں۔

جن ڈھوکاں تے بہکاں ماں یہ گرمی گزریں اُن ماں لدھا دھار، مھاڑ،  
 سوئی بگار، بڑی ڈھوک، چنچائی، گرجن، سری مستان، جانی، پدري، سنیوج،  
 وسترون، ناگہ پیری، اُبلواس، کندواس، واڈون، جانی تے سواں کا حساب  
 نال ساری ڈھوک شامل ہیں۔

بساکھ کا مہینہ ماں گوجر لوک اپنا بھار بدھ لیں تے جیٹھ، ہاڑ، ساون،  
 بھادرو، اُت گزار گے اُسوماں اپنا ڈیرہ کوچ کریں۔ رستاں مال تے عیال نا  
 سام سمبھال گو کم مچ ہی مشکل ہوئے۔ اس دوران گوجر جن شرطکاں تے رستاں کو  
 استعمال کریں اُن ماں مغل روڑ، کشتواڑ، جموں قومی شاہراہ، بوٹ، سرینگر  
 شاہراہ تے مچ ساری شرطکاں تے رستاں شامل ہیں۔ اپنا سفر کے دوران گجر بکروال  
 لوک گھوڑا، کچراں نال دھیں تے اپنوں سامان منزل در پہنچاویں۔ گھوڑا گو یوہ قافلہ  
 مھسیاں تے بھارواں تیں موہرے ہی پڑاں پر جا لگے۔ بکریاں گا اجڑ تے  
 مھسیاں گا ترنڈ قومی شاہراں ناکئی گھنٹاں توڑی بند رکھیں۔ ہو آؤ جانی چراں  
 توڑی روکنی پے۔ دشوار گزار رستاں تے ہو گے قافلہ گے بدھے۔ تھک ٹٹ گے  
 رات پڑاں پر پہنچیں تے اگلے دھیڑے سویلے ہی اگلی پڑاں گی تیاری کر لیں۔  
 پڑاں پر تنبواں کو منظر دیکھن بھالن جو گو ہوئے۔

سفر ماں اکثر مویشیاں نا موکھر کی بیماری گو خطرورہ جس ماں چوکھر  
 بھاروں کھانو چھوڑ دیں۔ کوئے وی طبیب موقع پر دوا دین واسطے دستیاب نہیں  
 ہوتو۔ تمام مصیبتاں تے مشکلاں کے باجود ہمت تے حوصلہ سنگ کم لے کے اگے  
 بدھیں۔ سیاناں تے عیاناں کئی دناں تک بگھاتے بھاناں رہیں۔ اسطراں موسمی  
 سفر کرنو گجر بکروال قبیلہ واسطے اک لکار ہوئے۔ آخر کار کئی دناں تو بعد ایہ لوک  
 اپنی ڈھوکاں، بہکاں ماں پچھ کے گجھ عرصہ تکر آرام کریں۔



## 1۔ لفظ تے اُن کا مطلب

دودھی	:	دُدھ کو کاروبار کرن آلو
لوڑ	:	ضرورت
تراکڑ	:	بھارواں گاچرن واسطے کھلی جگہ
پاڑیلنا	:	محنت کرنی
شرد	:	سردی
پڑاں	:	رات رُکن کی جگہ، بساں کرن کی جگہ
معالجو	:	علاج
عیانا	:	نکانکا جاتک

## 2- سوالات:

- (۱) موسمی سفر کے دوران گوجر بکروال قبیلہ ناں رستاں ماں کن کن اوکھتاں توں لنگنوے؟
- (۲) گوجر بکروالاں کی کجھ اک ڈھوک بہکاں کا ناں لکھو؟
- (۳) گجر بکروال ریاست جموں و کشمیر کی کن کن جگہ ماں رہیں؟
- (۴) گجر کن کن موسماں ماں اپنؤ سفر شروع کریں۔

## 3- بُن درج خالی جگہاں نا مناسب لفظاں نا پھرو۔

- (۱) بھیڑ بکری چارن آلا..... کہیو جائے۔
- (۲) گوجر بکروال لوکاں دوائی کی جگہ اکثر..... کو استعمال کریں۔
- (۳) مال مویشی ناں لگن آلی بیماری نا..... کہیو جائے۔
- (۴) گرجن کی ڈھوک..... ماں واقع ہے۔
- (۵) مھیس پالنی..... گجراں کو پیشو ہے۔

ایک کہانی

## ماں کی دُعا

حضرت موسیٰ علیہ السلام کو یوہ واقعہ مشہور ہے جے اُنھاں نے اک دھیانڈے خدا کے دعا کی جے اے خداوند کریم، ہوں اُس شخص ناکنوں چاہوں ہاں جیہڑ و جنت ماں میرے نال ہووے گو۔ اللہ تعالیٰ نے فرمایو ”اے موسیٰ توں فلانی جگہ چلیو جا۔ اُت اک قصائی رہ وہ جنت ماں تیر و گماہنڈی ہووے گو۔“ حضرت موسیٰ علیہ السلام لوڑتاں لوڑتاں اُس قصائی کی ہٹی پر پچ گیا تے ساری دھیانڈی کھلا تکتار ہیا جے اُس شخص ماں کہیڑی خوبی ہے جس کی وجہ تیں اُس نا یوہ مقام لبھو ہے۔ پر آپ نا اُس ماں کوئے خاص گل نہیں دی۔ جد شام نا قصائی گھر جان لگوتے موسیٰ علیہ السلام نے فرمایو ہوں بھی تیرے سنگ چلوں گو۔ اج ہوں تیر و مہمان ہاں۔ قصائی نے عرض کی ضرور چلو۔ آپ اُس نال ٹر پیا تاں جے یاہ گل جا کے تکیں جے یوہ آدمی گھر جا کے کہیڑی خاص عبادت کرے جس کو بدلو اللہ تعالیٰ نے یوہ عطا کیو ہے۔

قصائی گھر پچھوتے اُس نے اپنا بال بچہ سنگ کائے گل بات نہیں کی۔ وہ سدھوا لیکن بڈھی کولے گیو، اُس کو منہ ہتھ دھوایو۔ فراک رچھو لے کے بڈھیڑی نا روٹی کھوالی۔ حضرت موسیٰ نے قصائی تے پچھو یاہ بڈھیڑی کون ہے۔ اُس نے جواب دتو، یاہ میری ماں ہے۔

بڈھی جس ویلے روٹی کھا چکی تے اُس نے اپنا ہتھ چا کے دُعا کرنی شروع کی۔ ”اے اللہ میرا اس بچہ ناتوں دُنیا ماں خوش رکھیے تے آخرت ماں اِس نا حضرت موسیٰ علیہ السلام کے ناں جنت ماں جگہ عطا فرمائیے۔“

حضرت موسیٰ علیہ السلام نے قصائی تے پچھو ”تیری ماں تیرے واسطے جیہڑی دُعا منگے۔ تیرو کے خیال ہے یاہ دُعا اللہ تعالیٰ نے قبول فرمائی۔“

قصائی نے کہو ”مناں اتنی گل کولے پتو ہے جے اللہ تعالیٰ نے میری ماں کی دُعا کی وجہ تیں دُنیا ماں مناں ہر قسم کو آرام تے سکون عطا کیو وّو ہے۔ یاہ دعائے قبول ہوگئی ہے پر مناں اس گل کو کولے علم نہیں جے آخرت ماں مناں حضرت موسیٰ علیہ السلام کے ناں جنت ماں جگہ لبھے گی یا نہیں۔“

حضرت موسیٰ علیہ السلام نے فرمایو ”اے نیک آدمی توں خوش ہو جا۔ ہوں موسیٰ ہاں۔ اللہ تعالیٰ نے تیری ماں کی دُعا قبول فرمائی ہے تے تیناں جنت ماں میرے ناں جگہ ملے گی۔ توں ہی جنت ماں میرو گماہنڈی ہووے گو۔“





## 1- لفظ تے اُن کا مطلب

تکنو : دیکھنو

فلانی : کائے جایا چیز یا شخص در سینی کرنو

گماہنڈی : نال رہن آلو

سنگ : نال

بڈھیری : بڈھی صورت

آخرت : مرن تو بعد کی زندگی

## 2- سوالات:

- (۱) ماں کی دُعا کہانی ماں کے پیغام دتو گیو ہے؟
- (۲) حضرت موسیٰ نے اللہ تعالیٰ کو لوؤں کے پچھو؟
- (۳) حضرت موسیٰ کس کے گھر گیا؟
- (۴) قصائی کے گھر حضرت موسیٰ نے کے تکیو؟
- (۵) قصائی نے اپنی ماں سنگ کے سلوک کیو؟
- (۶) اللہ تعالیٰ نے قصائی کی ماں کی کہیری دُعا قبول کی۔

## 3- لفظاں ناں جمللاں ماں برتو:

شخص، گماہنڈی، قصائی، بڈھیری، گل، دُعا، جنت

## لوک بارمریاں ڈھینڈی

نتھیاتے مریاں ڈھینڈی کی لوک باراج بھی لوکاں کا دلاں ماں وراگ کو  
طوفان چاہڑھتی دسے تے اکھاں بچوں اتھرواں کا ناڑ لا کے جھولئی گو چھڑ کر  
چھوڑے۔ تارنخ کا یہ زندہ بول اج بھی ماہلیاں ماں کناں ماں ہجر و چھوڑاتے بل  
بلیاس کی آواز بن کے ہستاں ناروا چھوڑیں۔ عشق کی یاہ واہ اگ ہے جس نے  
تھلاں ماں چھال مروائیں، چڑھتی کانگ ماں کچا گھڑا پر چاہڑھیوتے وجود پروں  
پٹھی کھل لوائیں تے کسے نابلتا تندور ماں چھال مروا چھوڑیں۔ یاہ واہ چھڑکنی  
ہے جس نے بیگماں نادر یا ماں ڈوب کے ماریوتے مکھنی نامرگاں ماں، ڈھوکاں تے  
ماہلاں کی فضاتوں کڈھ کے اپنا مقدم کا فراق ماں جموں کی تپتی ڈھپاں ماں اپنو  
لہو کاڑھنو پیو۔ نتھیادیدڑتے مریا ڈھینڈی راجوری کی دھرتی پر پنجال کی بکل ماں  
بسیا اک گراں پروڑی کا باسی تھا۔ دواں کی اکھ چارہوئیں تے فردو وجودواں ماں  
اک ہی روح بن کے دل کی دھڑکن بن گیو۔ عشق تے مُشک چھپایا کد چھپیں۔  
نتھیاتے ڈھینڈی کا عشق کی گل ہر بکھی کھنڈ گئیں۔ تارنخ دان نتھیا کو اصلی ناں

عنایت دیدڑ دسیں جیہڑ و بڑ و بہادر تے سوہنی شکل آلو تھو۔ پروڑی گوجراں اُس کو راجواڑ و تھوتے نن پیر کی خوبصورت ماہلی کنڈرں گلی نا ان دیدڑ گوجراں نے اپنا بسپو بنا یو و تھو۔ مقدم نتھیا کی اس گراں ماں کچھری لگتی رہ تھی تے گراں کا معاملات نامیرٹ یو جائے تھو۔ اس کو متر یو بھائی بدیا اندرو اندر نتھیا نال بکھید رکھے تھوتے اُس کے خلاف ہون آلیں سازشاں ماں پیستورہ تھو۔

اسے گراں ماں گجھ گھر ڈھینڈاں تے بھلیسراں کا بھی تھا۔ مریاں ڈھینڈی کا ماں باپ بھی اتے کا بسنیک تھاتے مریاں کی ماں نے اُس کو رشتو گجھ مھیاں کا بدلہ ماں حسینا بھلیسر سنگ کروا چھوڑ یو تھو جیہڑ و مریاں ناذری بھی پسند نہیں تھوتے نہ ہی اُن کو ہان جوڑ تھو۔ پیر پنجال کی اس دلیر تے باجرات عورت نے دھنیاں کی اس سودے بازی کے خلاف آواز چائی تے اس کی شروعات اپنے گھروں ہی کی۔ اُس نے حسینا بھلیسر سنگ بیاہ کرن تیں انکار کر چھوڑ یو کیوں جے واہ اپنؤ دل پہلاں ہی مقدم نتھیا کی امانت بنا چکی تھی۔ چھیکڑ تنگ ہو کے مریاں کا ماں باپ شوپیاں ماں جا کے بس گیا پر ڈھینڈی برھیا کا دھیاڑا گنتی رہی تے جسپھی ڈھوکاں کی رت آئی تے لوک برھیا کا ڈھاراں ماں بلیں بلیں پچن لگ گیا تے مریاں نے اپنا محبوب کی ڈھوک کو پینڈ و کچھنو شروع کیوتے رستہ کی اوکھتاں کی پرواہ کرن بغیر ڈیرٹھ سو میل کو فاصلو

پہاڑاں، جنگلاں تے دریاں ناٹپتاں طے کیو۔ اُس نے چرار شریف کی زیارت پر نیا  
 زمینی تے شوپیاں توں نتھیا تے اُس کا رشتے داراں واسطے تحفہ خرید کے ٹرپئی۔ ہیر پور  
 ماں واہ اپنا ہتھاں کانگن لاه کے پہریداراں نادے چھوڑے تاں جے ویہ اڑچن  
 پیدا نہ کریں۔ اسے طرح رستہ ماں گجھ خواجاں کی طرفوں مال دولت تے ٹوم ٹلاں  
 زیور کی لالچ دین نا بھی تچ چھوڑے تے ان ساری چیزاں نا اپنا محبوب کا پیراں  
 پٹھ کی مٹی پر گھمان کی گل کہے۔ سفر کی ساری اوکھتاں نالتاڑتاں واہ ڈوبہ کی ڈھوک  
 پچ جائے۔ سفر کا پنیڈا نے اس کی سُدھ بدھ مار چھوڑی ہووے تے اُس کی مینڈھی  
 تے لیر دڈڑ ماں بھلنڈے جائیں پر اُس نا صرف یوہ سفر پورو کرنو تھوتے اپنا نتھیا  
 کول پوہچو تھو۔ ڈوبہ کی ڈھوک ماں بنیا ڈھاراں ماں پچ کے وہ ڈاروں ٹٹی کونج ہاروں  
 دوبارے میل کر کے رستہ کی ساری تھکاوٹ نا بھل جائے تے بھلیں بھلیں گھر کام  
 ماں جھٹ جائے۔ ہر پا سے خوشی کی بہار سہی ہوئے تھی۔ واہ اپنا گھر نا بد نظر توں بچان  
 واسطے ٹوٹکا کرتی تے منت منتی رہ تھی۔ گرمیاں کا دھیٹاڑا تے ڈوبہ ماں پتو نہیں چلیو کس  
 طرح گزر گیا۔ اس توں بعد نتھیا تے مریاں ڈھینڈی دوئے کھلا بٹ آجائیں۔

ایاں کھلا بٹ ماں دوچاہن آلا محبت کی پھل کھیلیاں ماں مست تھاتے  
 اوہاں حسینا بھلیسر نا طعناں تے معناں سنگ ساڑ یو جیا رہو تھوتے وہ انگاراں پر لمو

پیو ووتھو۔ تنگ آ کے اُس نے نتھیا تیں بدلولین کی قسم کھالی تے یاہ ہی اگ لے کے  
 بودھلا راجپوتاں کول جناں توڑیا تے اُتوں ناکام ہون پر راجوری جرال حکمراناں  
 اگے پیش ہو یو پر مقدم نتھیا کا دبدبہ، جو انمردی تے دوست داری کی وجہ توں ات  
 بھی اُس کی تمنا پوری نہ ہو سکی۔ چھیکڑوہ جموں کا دربا ماں حاضر ہو یوتے چھند پرت  
 کر کے نتھیا کے خلاف مقدمو کیوتے چھپ کے حملو کرن کی سازش تیار کی جس ماں  
 موندو موہرے موہرے تھو۔ ادھی رات نادھاڑ سٹ کے نور اچھی ہاروں ستاوانہتا  
 نتھیا پر حملو کر دتو جائے تے موندو چھری اُس کی گردن ماں گھبا چھوڑے تے  
 ڈھینڈی نابلاتاں بلاتاں نتھیا کی آواز بند ہو جائے۔ حسینو ڈھینڈی ناہتھیاں کی سبیل  
 بناوے پر اُس کی اکھاں ماں پہلاں ہی لہو چھانٹو ووتھو تلوار کڈھ کے حسینا کو سر  
 ڈھرنالوں جڈا کر چھوڑے تے موندو کی بانہہ کپ کے اپنا نتھیا کی جوان مرگی کی ساڑ  
 مکاوے۔ واہ اپنو حواس گنواپسے تے اپنا بال پٹی پٹی جھلی ہو کے پھرن لگ جائے۔  
 اُس کا منہ توں نکلن آلا روڑیاں کا بول لوک بار بن گیا جھیرا اج بھی راجوری کا  
 پہاڑاں تے جنگلاں ماں لوکاں نامریاں ڈھینڈی کا بین تے ہدکن کی آواز آوے۔  
 یوہ عشق امر ہو گیوتے مردار مندی موت مر کے دھرتی پیٹھ غیب ہو گیا۔ نتھیا کی قبر پر  
 اج بھی دعا منگن آلا لبھیں پر قاتلاں کی کائے نشانی بھی نہیں لبھتی۔



## 1- لفظ تے اُن کا مطلب

بار	:	اک لوک گیت جس ماں کائے کہانی کہی گئی ہوئے
گوچھڑ	:	گلو
ماہلی	:	شنگراں کی بقل ماں نیوتلو
بلی بلیاس	:	رونو
چھڑکنی	:	تڑفاٹ
تتی	:	گرم
بسیو	:	رہن کی جا
متریو	:	دوجی ماں کوپوت
ہان	:	برابر
چھیکٹ	:	آخر
اڈار	:	پکھرواں کورل اڈنو
موہرے	:	اگے
غیب	:	اوپلے ہونو

## 2- سوالات:

- (۱) مریاں ڈھینڈی کی بار کیوں مشہور ہے؟
- (۲) نتھیو ڈیڈر کت کورہن آلو تھو؟
- (۳) مریاں کی ماں نے حسینا بھلیسر سنگ مریاں کو بیاہ کاں کے عوض طے کیو تھو؟
- (۴) مریاں کا ماں باپ شوپیاں ماں کیوں بسیا؟
- (۵) مریاں ڈھینڈی نے اپنی محبت توڑ چاڑھن واسطے کے قدم چایا؟
- (۶) حسینا بھلیسر نے نتھیو ڈیڈر کے خلاف کے سازش کی؟
- (۷) مریاں ڈھینڈی کی کہانی اپنا لفظاں ماں لکھو۔

## 3- لفظاں نا جملاں ماں برتو:

کچھری، کانگ، نمیرو، عورت، چھیکر،  
ڈھوک، میل، موہرے، غیب



## گوجری ٹوپی

ہتھ نال بنائی جان آلی گوجری ٹوپی قبیلاں کی عورتاں ماں سب توں متی مقبول ہیں۔ اس ٹوپی ناں زنانیاں کے علاوہ نکا بچاں تے بزرگاں واسطے بھی بناؤ جائے۔ گوجری ٹوپی کا بکھ بکھ ناں بھی اُنھاں کی بناوٹ دیکھتاں رکھیا ہیں۔ جس ماں لچکو خاصو مشہور ہے

ٹوپیاں کی تاریخ ماں گوجری ٹوپی اپنی سجاوٹ تے بناوٹ کی وجہ نال سب توں بکھری پچھان رکھے۔ ات توڑی کے یاہ ٹوپی گوجر بکروال قبیلا کی عورتاں کی منڈلی پچھان ہے۔ ان ٹوپیاں نادھا گاتے کپڑا نال بناؤ جائے۔ جس پر کئی دھیاڑاں کی محنت لگے۔ سوئیاں نال سیڑی جان آلی اس ٹوپی کو مل پنج سو روپیہ تو شروع ہو کے ڈیڑھ ہزار روپیہ توڑی ہو سکے۔ خانہ بدوش گجراں ماں اس کی مقبولیت کی وجہ اس ٹوپی کو سونہپ، اس کی مضبوطی تے اس کو گرم ہونو بھی ہے۔



بچاں واسطے بنائی جان آلی گوجری ٹوپی نابیڑاں تے چاندی کا زیورات  
 نال سجایو جائے جد کہ سر کے اُپر اک پھمّنی بھی رکھی جائے۔ جس نال ٹوپی زیادہ  
 سوہنی تے بچاں پر سجن آلی ثابت ہوے۔ بچاں کی ٹوپی کا بھی کئی ڈیزائن ہیں  
 جھیڑا ج بھی دور دراز رہن آلا لوکاں ماں خاص مشہور ہیں۔

بزرگاں کی ٹوپیاں کی بناوٹ بھی کالسریاں کی ٹوپیاں تے زری بکھری  
 ہوے۔ اس ماں رنگ بھی بکھ طراں کا برتیا جائیں ہو ریاہ اُپروں تریکونی طرح  
 کی ہوے۔

گوجراں کی ہتھ کھڈیاں ماں ٹوپی کی چلت سب توں زیادہ ہے۔ ہر گراں،  
 شہر ماں ج بھی کال میری اس ٹوپی نابڑی دلچسپی نال لاویں۔ ہورنویں نسل  
 ماں بھی یاہ ٹوپی خاص پسند کی جائے۔ بھانویں جے ٹوپی بنان آلا کجھ علاقہ اپنی  
 بکھری پچھان رکھیں جن ماں بانڈی پور بھی ایک ہے۔ ہر گھر ماں کائے ناکائے  
 عورت جوان ہوئے یا بڈھی اپنا ہتھاں نال ٹوپی سیٹرن بنان کو ہنر رکھے۔ یوہ ہنر  
 ج بھلیں بھلیں مکتو جا رہیو ہے۔ تے اس نارہتی نسلاں توڑی پچھان واسطے اس کو  
 زندہ رہن ضروری ہے۔ لہذا نویں نسل نا اس ہنر نا اپنا نو ہوئے گو۔



## 1- لفظ تے ان کو مطلب:

لچکو : اک طرح کی اُچی گوجری ٹوپی

بکھری : بکھ، الگ

سیٹرنو : بُتو، بناؤ

سوہنپ : چنگیائی، خوبصورتی

پھمنی : اک طرح کو ہتھ کو بناؤ پھل

تریکونی : ترے پاسے آلی

بھلیں بھلیں : آہستہ آہستہ

## 2- سوالات:

- (۱) گوجری ٹوپی عورتاں کے علاوہ کن کن واسطے بنائی جائے؟
- (۲) اس قبیلہ کی عورتاں کی پچھان ماں گوجری ٹوپی نے کے کردار ادا کیو؟
- (۳) گوجری ٹوپی کو مل کے ہے؟

- (۴) بچاں کی گوجری ٹوپی کاں نان سجایو جائے؟
- (۵) بزرگاں کی گوجری ٹوپی باقی گوجر ٹوپیاں توں کس طرح مختلف ہے۔
- (۶) گوجری ٹوپی کا اس ہنر نا کس طرں بچایو جاسکے؟

### 3۔ تله دتا گیا لفظاں نا اپنا جملہاں ماں استعمال کرو:

ہتھ، عورت، کپڑا، سونیں، ٹوپی، ہتھ کھڈی، ہنر



## غزوہ بدر کو واقعہ

دو ہجری ماں تے رمضان شریف کی ستارہ ہویں تاریخ نابدر کی جنگ لڑی گئی۔ بدر اک بیابان، گرم تے ریتلی وادی تھی تے جیکر حضور پاک کا مبارک قدم اُس دھرتی پر نہ پیا ہوتا تے اج تاریخ ماں کدے بھی بدر کوناں نشان نہ ہوتو۔ بدر کی اس جنگ ماں کفارنا ہار کو منہ دیکھنؤ پیوتے اسلام نا کامیابی لہھی۔ نبی پاک مدینہ منورہ تیں کسے جنگ کی نیت سنگ نکلیا تھا۔ حضور کو ارادو صرف ابوسفیان کا اُس قافلہ کو مقابلو کرنو تھو جہیر و شام کا ملک بچوں تجارت کو سماں لے کے آوے تھو۔ ابوسفیان نا حضور کا ارادو کو بھیت لگوتے اُس نے اپنو رستو بدل لیوتے قریش کا مسلماناں نا حضور کا اراداں کی خبر پہچا چھوڑی۔ اس واسطے ایک بڑی فوج لے کے ٹر پیا۔ جس بیلے حضور نا انھاں کا ٹرن کو بھیت چلیوتے حضور نے کی رائے لی

جے اُنھاں کو جنگ کرن بارے کے خیال ہے، شامل ہونویں گایا نہیں، حضورؐ نے الفار کا سردار حضرت سعد بن معاذؓ سے سکھڑ کھلاں ہو کے عرض کی اے اللہ کا رسولؐ ہم ہر حال ماں تھارے سنگ ہاں۔ حضورؐ نے الفاری سرداروں کو یوہ جذبہ دیکھیوتے ویہ ڈاہڈ خوش ہویا۔

اُس ویلے مسلماناں کی گنتی صرف ترے سوتیراں تھی۔ اُنھاں کولں صرف دو گھوڑا تے ستر اونٹھ تھا۔ دو جے پاسے مشرکاں کولں یاراں سو سپاہی تھا۔ اُنھاں کولے پورا ہتھیار تھا۔ ست سو اونٹھ تھاتے اک سو گھوڑا تھا۔ مسلماناں کو حوصلو بدھان واسطے حضورؐ کی دعا تھیں۔ دو جے پاسے مشرکاں کو حوصلو بدھان واسطے ڈھول، باجاتے گان آلیں تھیں۔ مسلماناں نا اللہ کی ان دیکھی طاقت پر بھروسہ تھو تے مشرکاں نا دیکھیا واوسیلاں پر سخت مان تھو۔ جنگ کو وقت آن آلو تھو۔ ہُن یوہ وقت تھو فوج بچوں بچاں، لسا، کمزور تے بڈھیڑاں نا نکھیرن کو۔ حضورؐ پاک نے دیکھیوتے جے صفاں کے بچھکاروں اک بچو پیراں کا پنجاں بھار کھلاں ہو کے اپنو قد بدھان کی کوشش کر رہیوتھو۔ حضورؐ نے اُس بچے کو یوہ جذبہ دیکھیوتے اُس نا بھی لشکر ماں شامل کر لیو۔ اُس بچے کوناں محاذ تھو۔ محاذ کو نگر و بھائی بھی جس کوناں معوذتھو وہ بھی صفاں ماں کھلو اپنا بھائی ناں جنگ ماں جان واسطے تیار تھو پر حضورؐ نے اُس نا

جنگ ماں جان کی اجازت نہیں دتی۔ اُس نے جنگ ماں شامل ہونے واسطے دعوہ کیوے وہ اپنا بھائی تے مچ زیادہ طاقت آلو ہے۔ بھانویں مھاری چھھی کروا کے دیکھ لیو۔ جس ویلے چھھی کروائی گئی تے معاذ نے اپنا بڑا بھائی معوذ کا کن ماں کہیو جے بھائی توں تے جنگ واسطے تال لیو گیو ہے تے ہن کوئے کڈھ نہیں سکتو تے جے ہوں ہار گیوتاں حضور مناں لشکر بچوں کڈھ چھوڑیں گا۔ کدے میری خاطر تم ہار من لیں تاں میرو بھی کم بن جائے گو۔

ستاراں رمضان کو دینہہ چڑھیو تے دوئے فوج اک دو جا کے آمنے سامنے آگئیں۔ عرب ماں رواج تھو جے جنگ کا میدان ماں عام لڑائی تو پہلاں دوئے طرفوں ترے ترے لڑا کا پہلوان لڑن واسطے کڈھیا جیس تھا۔ کفار کی طرفوں ولید، شیبہ تے عتبہ نکلیا تے اسلامی لشکر کی طرفوں حضرت علیؓ، حضرت حمزہؓ تے حضرت عبیدہؓ نکلیا۔ ولید کو مقابلو حضرت علیؓ سنگ، شیبہ کو مقابلو حضرت حمزہؓ سنگ تے عتبہ کو مقابلو حضرت عبیدہؓ نال ہو یو حضرت علیؓ تے حضرت حمزہؓ نے اپنا بیریاں نا جہنم پہنچا چھڑیو۔

اس طرح جنگ کا شروع ماں ہی دشمنان نا اپنا سرداروں تو ہتھ دھونا پیا۔ اپنا سرداراں نا ڈھتا دیکھ کے اسلام کا بیر پوری طرح ہلو بول کے لڈیاں ہاروں

پے گیا۔ حضورؐ پاک کو عجیب حال تھو۔ کدے ویہ جنگ کا میدان در دیکھیں تے کدے اشمان کی طرف دیکھیں تھاتے دُعا کریں تھاتے ”اے اللہ اے ہمیشاں قائم رہن آلیا تیرا اگے ہی فریاد کروں“ جس ویلے گھمسان کی لڑائی شروع ہوئی۔ جبرائیل آمین کا کہن پر مُٹھی بھر کے ریت زمین پروں چائی تے اُس پر کجھ پڑھ کے مُشرکاں در پھینکی۔ ریت پھینکتاں ہی فرمایو جے اے اللہ اُنھاں کا دِلاں ماں ڈر پیدا کر۔ فرشتاں نے اس ریت ناہر مشرک کی اکھ، نک تے مُنہ ماں پہچا دتو۔ قرآن پاک ماں بھی اس کی گواہی ہے۔

جنگ کا میدان ماں اسلامی لشکر کو جھنڈ و حضرت عبدالرحمن ابن عوفؓ کا ہتھ ماں تھو۔ اُنھاں نے سوچیو جے اپنے اگے کچھ دیکھ لیوں کون کون ہے کیوں جے جنگ ماں کوئے بھی ہو سکے۔ حضرت عبدالرحمن ابن عوفؓ اپنے کوئے دو بچاں نا دیکھ کے حیران ہو گیا۔ اُنھاں بچوں ایکن بچہ نے کچھویو جے چاچا سامنے دشمنان کی فوج ماں ابو جہل کہیڑو ہے۔ ویہ اُس بچہ کو سوال سُن کے حیران پشیمان ہو گیا جے یاہ عمر تے اتنو جذبو۔ بچہ نے کہیو جے رسول پاکؐ کا دشمن کو پتو ہم نا ضرور دسیو جس نے میرا پیغمبر نا طرح طرح کی تکلیف دتی ہیں۔ کجھ چر بعد ابو جہل گھوڑا اُپر سوار ہو کے بڑی پھرتی سنگ صفاں بچوں جائے تھو حضرت

عبدالرحمن ابن عوفؓ نے اشارو کر کے بچہ نادسیو جے ابو جہل ہے جھیر و خدا کا رسولؐ کو دشمن ہے۔ اشارو کرن کی دیر ہی تھی۔ بچہ بجلی ہاروں ابو جہل دردوڑیا تے اک ہی وار ماں ابو جہل نازخمی کر کے گھوڑا پروں ڈھا چھوڑیو۔ ابو جہل کو زخمی ہونو تھوتے سارا کافراں کو غرور مٹی ماں رل گیو۔ اللہ اللہ اُس بدر کی وادی کو کے نظارو ہووے جو جس ویلے اک نکا جہیا بچہ نے پوری جنگ کو پاسو پرت چھوڑیو۔ ابو جہل کے بعد مشرکاں کا حوصلوٹ گیوتے ویہ ہار گیا تے ناکامی اُن کو مقدر بن گئی تے اسلام کی بڑی کامیابی ہوئی۔



## 1۔ لفظ تے اُن کا مطلب:

ریتلی	: ریت آلی
سمیان	: چیز، لتو پتو
ترکن	: سرن پر لکڑی کی آواز
سکھڑ	: سیدھو
مشرک	: شرک کرن آلا، مخالف
لسا	: کمزور



چبھی : لڑائی، جھگڑو

گھمسان : گانچ

چر : دیر

## 2- سوالات:

(۱) سن دو ہجری کا رمضان کی ستارہویں تاریخ نا کہیڑ و واقعہ پیش آئیو؟

(۲) غزوہ ماں مسلماناں کی کل گنتری کتنی تھی؟

(۳) مشرکاں نے فوج کو حوصلو بدھان واسطے کے کیو؟

(۴) عرب ماں جنگ توں پہلاں کس لڑائی کو رواج تھو؟

(۵) بدر کا جنگ کو پاسو کس نے پرت چھوڑ یو تھو؟

(۶) بدر کی جنگ ماں اسلام کو جھنڈو کس صحابی کا ہتھ ماں تھو؟

## 3- لفظاں نا جملاں ماں برتو:

ترکن، ٹرن، سمیان، سبق، سردار، اکھ، پشیمان



## ڈاکٹر بی۔ آر۔ امبیڈکر

ڈاکٹر بی۔ آر۔ امبیڈکر کو پوروناں بھیم راؤ رام جی امبیڈکر تھو۔ ان کو جنم ۱۴ اپریل ۱۸۹۱ء ناں مدھیہ پردیش کا قصہ ماؤماں ہوو تھو۔ اُن کا باپ کوناں رام جی مالو جی سکیاں تے والدہ کوناں بھیمائی تھو۔ اُن کا والد فوج ماں ملازم تھاتے دلت طبقہ ناں تعلق رکھیں تھو۔

بھیم راؤ امبیڈکر کی شروع کی تعلیم جماعت کا کمرہ کے باہر ہوئی کیوں جے اُس ویلے دلت طبقہ کا بچاں نا اُچی ذات کا بچاں سنگ پڑھن کی اجازت نہیں تھی۔ بی۔ اے۔ کو امتحان ایلفن سٹون کالج تیں پاس کیو۔ امریکہ کولمبیا یونیورسٹی تیں ایم۔ اے۔ تے پی۔ ایچ۔ ڈی کی ڈگری حاصل کیں تے قانون کی تعلیم تے سند برطانیہ تیں حاصل کی۔

ڈاکٹر امبیڈ کرناں ”بابا صاحب“ امبیڈ کرناں نال بھی جانو جائے۔ انھوں نے ساری عمر دولت تے مظلوم طبقاں ناسماج کا دو جا طبقاں کے برابر لیان تے ان کی تعلیم واسطے کوشش کیں۔ انھوں نے اپنی زندگی کو متو حصو ذات پات کے خلاف لڑائی تے مظلوماں کی بھلائی کا کماں ماں بتیا یو۔

ڈاکٹر امبیڈ کرنے آزاد ہندوستان کا آئین بنان ماں اہم کردار ادا کیو۔ ویہ آئین کمیٹی کا چیرمین کی حیثیت کا طور ور آئین بنان آلا شخص منیا گیا ویہ آزاد ہندوستان کا پہلا وزیر قانون رہیا ہیں۔

۶ دسمبر ۱۹۵۶ء نا ۶۵ براں کی عمر ماں ڈاکٹر امبیڈ کر دہلی ماں فوت ہو گیا۔ ان کو جنم دھیڑو (تاریخ پیدائش) ۱۴ اپریل نا امبیڈ کر جنتی کا طور پر ملک بھر ماں منایو جائے۔

بہمی صدی کا منیا پڑ منیا مفکر، سماج سدھارک، اُستاد، قانون دان، مصنف، ماہر اقتصادیات تے ماہر سیاسیات کا طور پر ڈاکٹر امبیڈ کرناں ہمیشہ یاد رکھیو جائے گو۔ ان نا قوم تے ملک کی خدمت واسطے ”بھارت رتن“ کو اعزاز بھی دتو گیو ہے۔ انھوں نا آزاد ہندوستان کا قانون کو معمار بھی کہیو جائے۔



## 1- لفظ تے اُن کا مطلب

دلت	:	اک ہندو طبقہ
مظلوم	:	جس نال ظلم وھے
متو	:	زیادہ
نیا پڑنیا	:	ہمیشہ جانیاں جان آلا

## 2- سوالات:

- (۱) بھیم راؤ امبیڈکر کو جنم کت ہوو؟
- (۲) ڈاکٹر امبیڈکر ناں کیوں نال جانو جائے؟
- (۳) دلت طبقاں کالو کاں واسطے ڈاکٹر امبیڈکر نے کے کم کیا؟
- (۴) ہندوستان کا قانون کو معمار کس نا کہیو جائے؟

## 3- ان لفظاں ناں جملاں ماں برتو:

قانون دان، مفکر، بھارت رتن، معمار